



CRITERIOS PARA A ADMISIÓN

1. Existencia de irmás/áns matriculadas/os no centro.

- Só se terán en conta os que vaian continuar escolarizados durante o curso escolar para o que se solicita a admisión
- Terán a consideración de irmás ou irmáns
 - a) As persoas sometidas a tutela ou acollemento familiar permanente ou preadoptivo legalmente constituído dentro da mesma unidade familiar.
 - b) As fillas e fillos das familias formadas por nais ou pais separados ou divorciados, aínda que non sexan fillos comúns.

A acreditación deste criterio realizarase mediante fotocopia completa do libro ou libros de familia ou, no caso de menores en situación de acollemento, mediante fotocopia da resolución ditada pola Xefatura Territorial da Consellería de Traballo e Benestar.

Valoración do criterio: Por unha irmá ou irmán matriculado no centro, outorgaranse 8 puntos; polo segundo e seguintes irmáns, 2 puntos por cada un.

2. Nai ou pai que traballe no centro.

Valoración do criterio: outorgaranse 3 puntos.

3. Proximidade do centro ao domicilio familiar ou ao lugar de traballo dos pais ou titores.

3.1. proximidade do centro ao domicilio familiar:

- Cando os representantes legais do alumnado vivan en domicilios diferentes, considerase como domicilio familiar o daquel con quen este conviva.
- Con carácter excepcional, poderá considerarse como domicilio familiar o de outros familiares cos que efectivamente conviva a alumna ou alumno, sempre que esa convivencia real se probe mediante certificación específica expedida ao efecto polo concello, a partires dos informes da Policía Local ou da Garda Civil, agás no caso de menores en situación de acollemento no que as familias de acollida presentarán a fotocopia da resolución ditada pola Xefatura Territorial da Consellería de Traballo e Benestar.

O domicilio familiar acreditarase mediante certificado do Padrón municipal no que figuren todos os membros da unidade familiar que conviven nel. A data de alta no concreto domicilio deberá ter unha antigüidade mínima de un ano respecto ao inicio do procedemento de admisión, agás circunstancias debidamente xustificadas. Así mesmo, o certificado deberá estar expedido dentro do ano natural ao que corresponda o proceso de admisión.

A dirección solicitará, ao día seguinte do remate do prazo de presentación de documentación, á xefatura territorial correspondente que verifique que os datos de identificación fiscal, emitidos pola Axencia Estatal de Administración Tributaria no ano no que se solicita praza escolar, coinciden cos aportados no certificado do Padrón municipal.

De non coincidir os domicilios familiar e fiscal, as persoas interesadas deberán presentar a seguinte documentación complementaria: copia do título que lexitime a ocupación da vivenda declarada como domicilio familiar (escritura de compravenda ou doazón, contrato de aluguer) e contrato de alta de recibos actualizados de subministracións (auga, luz, gas) a nome da persoa ou persoas que solicitan a admisión.

3.2. Proximidade do centro ao lugar de traballo dos pais

Acreditarase:

- No caso de persoas que presten servizos retribuídos por conta allea, mediante a achega de documento expedido para o efecto polo empregador xunto cunha copia do contrato de traballo. O centro de traballo deberá estar determinado nunha localidade e enderezo concreto.
- No caso de traballadoras e traballadores por conta propia, mediante a alta censual inicial ante a Axencia Estatal de Administración Tributaria, con todas as posibles modificacións posteriores e altas na Tesourería Xeral da Seguridade Social no réxime correspondente.
- O persoal ao servizo das administracións públicas, presentará unha certificación expedida pola xefatura de persoal correspondente.

Valoración deste criterio realizarase aplicando os seguintes baremos, con carácter excluínente:

- Proximidade do domicilio familiar:
 - a) Se se atopa na área de influencia do centro: 6 puntos.
 - b) Se se atopa nas áreas limítrofes á área de influencia do centro: 3 puntos.
- Proximidade do lugar de traballo:
 - a) Se está situado dentro da área de influencia do centro: 4 puntos.
 - b) Se está situado nas áreas limítrofes á área de influencia do centro: 2 puntos.

4. Renda anual per cápita da unidade familiar.

- Terase en conta a renda da unidade familiar que corresponda ao **exercicio fiscal anterior en dous anos** ao ano natural no que se presenta a solicitude.
- Considérase que a unidade familiar está integrada polos cónxuxes non separados legalmente ou parellas de feito debidamente inscritas no Rexistro de Parellas de Feito de Galicia e, se os houber, por:
 - a) As fillas e fillos menores de idade, con excepción dos menores que, con consentimento dos pais ou titores, vivan independentemente.
 - b) As fillas e fillos maiores de idade incapacitados.
 - c) Nos casos de nulidade, separación ou divorcio, entenderase por unidade familiar a formada pola nai ou pai e todos os fillos que residan habitualmente cun ou outro, que reúnan os requisitos subliñados no apartado anterior.
 - d) Nos casos de custodia compartida, entenderase como renda da unidade familiar á das persoas que convivan no domicilio familiar indicado na solicitude.

Para a valoración da renda da unidade familiar, as persoas interesadas deberán sinalar na solicitude a cantidade que resulte da suma da base imponible xeral e da base imponible do aforro na declaración da renda conxunta, ou no seu caso, a que resulte da suma das declaracións individuais dos membros da unidade familiar, dividida entre o número de membros computables desta.

Os solicitantes autorizarán expresamente a utilización da información de carácter tributario que se precisa para a acreditación da renda anual da unidade familiar, que será subministrada directamente a esta consellería pola Axencia Estatal de Administración Tributaria, a través de medios informáticos ou telemáticos. Tanto que se optase por unha tributación conxunta como por unha tributación individual, a autorización concederáse por ambos os dous cónxuxes.

A valoración da renda anual per cápita da unidade familiar realizarase con referencia ao indicador público de renda de efectos múltiples (IPREM) correspondente ao exercicio fiscal ao que se refire apartado 1 deste artigo, coa seguinte escala:

- a. Se é inferior a 0,5 veces o IPREM: 3 puntos.
- b. Se é igual ou superior a 0,5 e inferior a 0,75 veces o IPREM: 2 puntos.
- c. Se é igual ou superior a 0,75 veces e inferior ao IPREM: 1 punto.
- d. Se é igual ou superior ao IPREM: 0 puntos.

5. Condición de familia numerosa

- Terase en conta sempre que reúnan os requisitos que antes do final do prazo de presentación de solicitudes.

Acreditarase mediante fotocopia do título oficial en vigor ou do carné familiar galego expedidos pola Consellería de Traballo e Benestar, ou copia da solicitude de recoñecemento ou renovación.

A valoración por este criterio é a que segue:

- a) Por pertencer a familia numerosa de categoría especial: 3 puntos.
- b) Por pertenza a familia numerosa de categoría xeral: 2 puntos.

6. Condición de familia monoparental

- Terá a consideración de familia monoparental a que reúna os antes da finalización do prazo de presentación de solicitudes.

Acreditarase mediante fotocopia do libro de familia, certificado de convivencia, resolución xudicial de separación, divorcio ou medidas paterno-filiais ou convenio regulador.

A valoración deste criterio é de 2 puntos.

7. Discapacidade do alumno/a ou en pai/nai, titor/a, irmá ou irmán do alumnado

- Terase en conta as discapacidades en grao igual ou superior ao 33%, recoñecida antes da finalización do prazo de presentación de solicitudes.

Acreditarase mediante a certificación do grao de minusvalía expedida pola Consellería de Traballo e Benestar ou, se é o caso, do órgano competente doutras administracións públicas.

A valoración por este criterio realízase aplicando o seguinte baremo, cun máximo de 4 puntos:

- a) Por discapacidade da alumna ou alumno: 4 puntos.
- b) Por discapacidade dun dos proxenitores ou titores: 3 puntos.
- c) Por discapacidade dalgún dos irmáns da alumna ou alumno: 1 punto por cada un deles.

8. Criterios establecidos por cada centro educativo,

Con anterioridade ao inicio do proceso de admisión de alumnado, os centros educativos poderán establecer un criterio complementario que se fará publico no taboleiro de anuncios antes do inicio do proceso de admisión.

A valoración deste criterio é de 1 punto.

PUNTUACIÓN TOTAL E CRITERIOS DE DESEMPATE

- A puntuación total acadada conforme aos criterios e valoración establecidos nos artigos precedentes decidirá a orde de admisión.
- No caso de empate na puntuación final, resolverase atendendo á maior puntuación obtida en cada un dos referidos criterios atendendo a seguinte orde de prelación:
 - a) Existencia de irmás ou irmáns matriculados no centro.
 - b) Nai, pai ou titores que traballen no centro.
 - c) Proximidade do centro ao domicilio familiar ou ao lugar de traballo de nai, pai ou titores.
 - d) Renda anual per cápita da unidade familiar.
 - e) Condición de familia numerosa.
 - f) Condición de familia monoparental.
 - g) Concorrenza de discapacidade na alumna ou alumno, da nai, pai ou titores ou dalgunha irmá ou irmán.
 - h) Criterio establecido polo centro educativo.
- Se se mantén o empate, este resolverase aplicando o resultado dun sorteo público, catro letras do abecedario, que determinarán, correlativamente, a primeira e segunda letra do primeiro apelido e a primeira e segunda letra do segundo apelido.